



ALIJA
IZETBEGOVIĆ
M U Z E J

NEWSLETTER

JU Muzej "Alija Izetbegović" Sarajevo
Broj 3/2022 Maj-Juni 2022.



U POSJETI GRADONAČELNICI



SJEĆANJE

SAFET ZAJKO,

*komandant 2. viteške motorizovane brigade, Zlatni
liljan i nosilac Ordena heroja oslobodilačkog rata ...*



www.muzejalijaizetbegovic.ba

Učenici iz **BiH i Turske** u Muzeju



Predstavnici OŠ "Stari Ilijaš" posjetili su JU Muzej "Alija Izetbegović" 11. 05. 2022. godine. Skupa s njima bili su nastavnici i učenici njihove bratske škole "Bilge Soyak" iz Istanbula koji su ovih dana u posjeti Sarajevu i Bosni i Hercegovini.

Učenicima se prilikom posjete Muzeju posvećuje posebna pažnja. Prikazati život jednog čovjeka kao što je bio Predsjednik Izetbegović najmlađoj populaciji je uvijek predstavljao izazov. Ali lakše je kad na drugoj strani vidite ljubav i poštovanje kakvo se gaji prema njemu u BiH i Turskoj.



Klica iz koje raste **čovječanstvo**



Posjetili su nas i dragi gosti iz Prve osnovne škole Ilidža. Mališani su imali priliku upoznati se sa životom Alije Izetbegovića i novijom historijom Bosne i Hercegovine, na njima zabavan i interesantan način. Oštromna i pronicljiva pitanja naših najmlađih tokom posjete o našoj domovini, a posebno o njenom prvom Predsjedniku, su znak da trud uvijek daje rezultate.

Oni su, ipak, kako je on govorio, klica iz koje raste čovječanstvo.



Posjeta tri **gradačaćke** škole



U ponedjeljak 23. 5. 2022. posjetu JU Muzej „Alija Izetbegović“ upriličili su učenici tri gradačaćke osnovne škole: „Mehmed-beg Kapetanović Ljubušak“, „Hamdija Kreševljaković“ i „Edhem Mulabdić“. U pratnji roditelja i učitelja mališani su imali priliku posjetiti stalnu muzejsku postavku kroz koju su ih proveli naši vodiči.

Naši mali posjetioci su bili uzbuđeni što su imali priliku posjetiti Predsjednikovo naslijeđe o kojem su im govorili njihovi učitelji. Izuzetno nam je drago kada mlađe generacije uvažavaju ličnost i djelo Predsjednika Izetbegovića, pokazujući time da principi za koje se on tokom života zalagao žive i danas.

Velika nam je čast biti dio edukativnog i odgojnog procesa koji je jedan od osnovnih gradivnih elemenata uspješne i progresivne države.

Sa našim prijateljima **nastavljamo naprijed**



Muzej "Alija Izetbegović" ugostio je 18. 5. 2022. učenike i nastavno osoblje Osnovne škole "Stjepan Polje" Gračanica. Tokom posjete upriličen je obilazak muzejske postavke uz pratnju vodiča, kao i interaktivno predavanje o naslijeđu Predsjednika Alije Izetbegovića. Ponosni smo što kao medijatori kolektivnog iskustva imamo priliku učenicima pružiti poticajno okruženje u kojem mogu sticati nova znanja i iskustva. Cijenimo bitnim kod učenika probuditi svijest o značaju djela Predsjednika Izetbegovića i ideja koje je on za života promovirao.

U duhu tih ideja i mi, u suradnji s našim prijateljima iz škola, nastavljamo naprijed.



Vrelo darovitih ljudi i talenata



Učenici i nastavnici 3. razreda Behrambegove medrese iz Tuzle su posjetili Muzej "Alija Izetbegović". Upravo je rad sa učenicima jedna od aktivnosti kojoj se posvećuje posebna pažnja u našoj ustanovi. Obrazovanje i odgoj mladih su prioriteti svakog društva i zajednice. U razgovoru prilikom posjete prisjetili smo se i riječi Predsjednika Alije Izetbegovića da je naša Bosna ne samo vrelo hrabrosti i junaka nego i darovitih ljudi i talenata



Posjeta Međunarodnog fonda solidarnosti EMMAUS



Predstavnici Međunarodnog fonda solidarnosti EMMAUS (MFS-EMMAUS) i učenici iz internatskog smještaja Potočari posjetili su JU Muzej "Alija Izetbegović" 20. 5. 2022. Uz pratnju vodiča kroz renovirani izložbeni prostor djeca su imali priliku vidjeti našu stalnu postavku i čuti niz interesantnih činjenica o životu i angažmanu Predsjednika Alije Izetbegovića.

Predsjednik nam je poručio da mladima govorimo o našoj zemlji i njenoj historiji i da ne dozvolimo "...da na te važne stvari padnu zaborav ili prašina". Shodno tome, visoko vrednujemo edukativni rad s novim naraštajima.

Kroz kontinuirani rad s populacijom mladih Muzej, u saradnji s njihovim matičnim institucijama, igra važnu ulogu u procesu obrazovanja, a samim time i u borbi za prosperitetnu državu Bosnu i Hercegovinu.



Posjeta OŠ "Zaim Kolar" iz Trnova

Posjetili su nas učenici i nastavnici OŠ "Zaim Kolar" iz Trnova. U ugodnom i korisno provedenom vremenu i druženju sa mališanima iz škole učili smo nove stvari o našem prvom Predsjedniku Aliji Izetbegoviću i historiji Bosne i Hercegovine te razvijali nove vještine kroz promatranje, dijalog i neposredan odnos sa prostorom i predmetima.



Gosti iz Brčkog

Ugostili smo i drage goste iz Brčkog. Bili su to najuspješniji polaznici mektske pouke i predstavnici Medžlisa Islamske zajednice iz Brčkog.

U druženju sa njima imali smo priliku podsjetiti se koliko naši sugrađani iz cijele Bosne i Hercegovine cijene ličnost i djelo Predsjednika Alije Izetbegovića.



Druženje sa našim najmlađim

Predstavnici i polaznici mekteba, njih pedesetak, iz džemata Bajvati iz Zavidovića, upriličili su posjetu 29. 6. 2022. godine JU Muzeju „Alija Izetbegović“. Rad sa dragim gostima iz cijele naše domovine čini nam veliko zadovoljstvo i čast. Nakon obilaska muzeja ostatak vremena smo proveli u ugodnom druženju sa našim najmlađim.



Likovna radionica “Moj bijeg u slobodu”

Završena je Likovna radionica “Moj bijegu slobodu” organizovana na inicijativu JU Muzej “Alija Izetbegović”, a u saradnji sa istaknutim samostalnim umjetnikom Dževdetom Nikočevićem. Aktivnosti su trajale u periodu od 10. 5. do 24. 5. 2022., a učenici su tokom rada sa mentorom imali priliku upoznati se sa pravilnim načinima posmatranja i razumijevanja umjetničkih disciplina. Cilj ove likovne radionice bio je pružiti učenicima srednjih škola s područja Kantona Sarajevo što kvalitetniju edukaciju iz domena likovne kulture. Učesnici likovne radionice su učenici iz Treće gimnazije Sarajevo i Srednje mašinske tehničke škole Sarajevo. Srednjoškolci su učili o sublimaciji crteža i boje te važnosti likovnog aspekta kao glavnog alata pravilnog pristupa umjetničkom radu. Za inspiraciju su im poslužile fotografije na kojima su prikazane znamenitosti naše domovine. Radionica se održavala u Galeriji “Preporod” u Sarajevu.



Predsjednik Izetbegović je volio umjetnost i smatrao ju je jednom od glavnih odlika čovječnosti ili kako je on to sročio u svojoj knjizi “Islam između istoka i zapada”: “Umjetnost je moguća samo utoliko, ukoliko je čovjek različit od prirode, ukoliko je stranac u njoj. U svom najautentičnijem dijelu umjetnost je povijest tog tuđinstva”. Kroz ove i slične aktivnosti Muzej nastoji sačuvati njegovo naslijeđe i njegovati ideje koje je on živio.



Peti maj

Dan sjećanja na ubijenu djecu Sarajeva

Petog maja obilježava se Dan sjećanja na ubijenu djecu Sarajeva od 1992. do 1995. godine. Hiljadu šest stotina i jedan mladi život je ugašen tokom barbarske opsade Sarajeva i još skoro petnaest hiljada mališana je ranjeno.

Prisjećamose apela Predsjednika Izetbegovića upućenog sa sastanka Savjeta sigurnosti UN-a, New York, 7. 9. 1993. godine.

“...Jučer je u Sarajevu počela nova školska godina. Nastava se ne održava po školama, jer su one ili razorene ili nesigurne, nego po magacinima, podrumima ili garažama. Djeca Sarajeva nakon svih strahota koje su preživjela, a mnogo hiljada njih nije preživjelo, imaju pravo na normalnu školu kao sva druga djeca svijeta. Omogućite im to. Dignite ovu sramnu opsadu grada. Učinite to konačno.”



Sjećanje na Safeta Zajku

Tokom borbenih dejstava na Mijatovića kosi 17. 06. 1993. godine na sarajevskom ratištu poginuo je Safet Zajko, komandant 2. viteške motorizovane brigade Armije RBiH i dobitnik Zlatnog ljiljana. Kao brigadni general Armije odlikovan je posthumno Ordenom heroja oslobodilačkog rata 1994. godine.

Ostala je upamćena njegova izjava data “Oslobođenju” da je za Bosnu i Hercegovinu časno i poginuti.




Photo Credit: radiosarajevo.ba





U posjeti Gradonačelnici

Gradonačelnica Grada Sarajeva Benjamina Karić ugostila je direktoricu JU Muzej „Alija Izetbegović“ Nadju Berberović-Dizdarević u Vijećnici 31. 5. 2022. godine.

Tokom ove posjete izražena je spremnost za saradnju između Grada Sarajeva i Muzeja. Dogovorena je i podrška muzejskim projektima, među kojima je i drugi ciklus Ljetne škole diplomatije.

Zahvaljujemo se Gradonačelnici na iskazanoj podršci i radujemo se budućoj saradnji.



Photo Credit: City Guide 360

Posjeta Udruženja jordanско-bosanskohercegovačkog prijateljstva i poslovne saradnje

Dana 16.05.2022. Muzej „Alija Izetbegović“ su posjetili predstavnici Udruženja jordanско-bosanskohercegovačkog prijateljstva i poslovne saradnje. Čast nam je bila ugostiti delegaciju predvođenu predsjednikom Upravnog odbora, Adnanom Bushnaqom i članom Upravnog odbora, Anasom Nairoukhom.

Naši prijatelji iz Jordana obišli su stalnu muzejsku postavku uz pratnju direktorice Nađe Berberović-Dizdarević. Tokom posjete imali su priliku upoznati se sa dosadašnjim radom i aktivnostima Muzeja te razgovarati sa direktoricom o mogućnostima buduće saradnje na polju afirmacije svih vrijednosti i ideja za koje se Predsjednik Izetbegović zalagao.

Predstavnici Udruženja izrazili su punu podršku radu Muzeja i izrazili spremnost da podrže buduće muzejske projekte.



Ugodne nastupajuće bajramske dane želi vam kolektiv Muzeja „Alija Izetbegović“.



“Alija Izetbegović, između Istoka i Zapada”

U organizaciji JU Muzej Tešanj i JU Muzej „Alija Izetbegović“ u prostorijama Opće biblioteke Tešanj 6. 5. 2022. otvorena je izložba fotografija „Alija Izetbegović, između Istoka i Zapada“, a u sklopu općinske manifestacije Tešanjско proljeće 2022., i bit će otvorena do 13. 5. 2022. godine.

Prisutnima su se obratili direktorica JU Muzej Tešanj, mr. Mensura Mujkanović, Nervan Dizdar ispred JU Muzej „Alija Izetbegović“ i načelnik Općine Tešanj, mr.sc. Suad Huskić, koji je zvanično otvorio izložbu.

Izložba fotografija „15. april – Dan Armije Republike Bosne i Hercegovine“ u Goraždu

U sklopu programa Dani otpora 2022. u Bosansko-podrinjskom kantonu u Centru za kulturu u Goraždu postavljena je izložba fotografija “15. april - Dan Armije RBiH” od 5. 5. – 14. 5. 2022. godine. Dio je to saradnje JU Muzej “Alija Izetbegović”, JU Fond Memorijala KS i Fondacije Alija Izetbegović.

Izložba fotografija „15. april – Dan Armije Republike Bosne i Hercegovine“ predstavlja hronološki razvoj jedne časne Armije, čiji je zadatak bio da brani temelje i principe na kojima je počivala nezavisna, suverena i multietnična Republika Bosna i Hercegovina.

Fotografije izložene posjetiocima, dolaze iz bogatog fundusa JU Muzeja „Alija Izetbegović“ i JU Fond Memorijala KS, i nastale su tokom najkritičnijih godina po opstanak naše države.



Photo Credit: Agencija Anadoluja

“Alija Izetbegović, prijatelji i saradnici” u sklopu Dana Kantona Sarajevo 2022.

U Muzeju “Alija Izetbegović” u Sarajevu u sklopu manifestacije “Dani Kantona Sarajevo 2022” predstavljena je izložba “Alija Izetbegović, prijatelji i saradnici”.


“Ono što je interesantno jeste da su to ljudi iz raznih sfera društvenog života, koji su zajedno s predsjednikom ostavili značajan historijski pečat u jednom od najtežih perioda po opstanak Bosne i Hercegovine. Mi smo ovu izložbu predstavili i ranije, u galeriji Općine Novi Grad. Međutim, ovaj put smo željeli da to bude u prostorijama Muzeja ‘Alija Izetbegović’, u jednom renoviranom ambijentu, nakon realizacije projekta adaptacije stalne muzejske postavke “, rekla je Cakić Rizvanović, zamjenica direktorice Muzeja “Alija Izetbegović” na samom otvaranju izložbe.

Prema njenim riječima, fotografije su praćene izjavama i citatima, te na neki način predstavljaju i svjedočanstvo jednog vremena u kojem su živjeli.

Međunarodni dan muzeja

Muzeji širom svijeta 18. maja obilježavaju Međunarodni dan muzeja. Međunarodno vijeće muzeja (ICOM) kao predstavnik svjetske muzejske zajednice vodi ovu inicijativu od 1977. godine. Pokrenuta je nakon usvajanje rezolucije o stvaranju godišnjeg događaja s ciljem daljeg objedinjavanja kreativnih težnji i napora muzeja i skretanja pažnje svjetske javnosti na njihovu aktivnost.

Muzeji su mjesta koja svjedoče sveukupnosti materijalnih i duhovnih vrijednosti jednog naroda, pa su stoga izuzetno važna karika u lancu upoznavanja, razumijevanja i saradnje među kulturama. Kao čuvari blaga čovječanstva oni igraju ključnu ulogu u obrazovanju novih naraštaja. Na taj način muzeji predstavljaju sponu između kultura i generacija te sadašnjosti i prošlosti.



“Kultura je, prije svega, znak ili dokaz postojanja jednog naroda”

A. Izetbeg

25.05.1995.

Godišnjica Masakra na tuzlanskoj kapiji

“Čitava naša borba bila je sukob između zla i dobra, ali kontrast između dva načela ovaj put bio je potpun: bradate ubice iz ozrenskog brloga i vedra lica mladića i djevojaka na tuzlanskom šetalištu.” Alija Izetbegović

Masakr na Kapiji, poznat i kao zločin nad tuzlanskom mladošću, jedan je od najtežih zločina počinjenih nad civilima Tuzle. Dogodio se 25. maja 1995. godine kada je projektil ispaljen sa Ozrena pokosio na licu mjesta 71 osobu i povrijedio 150 drugih, listom mladića i djevojaka. Najmlađa žrtva tog stravičnog čina bila je dvoipogodišnja beba.

Novak Đukić, bivši oficir VRS, komadant Taktičke grupe “Ozren” proglašen je krivim i osuđen na zatvorsku kaznu od 20 godina koju nikada nije počeo izdržavati pobjegavši u Srbiju.



31.05.1992.

Dan bijelih traka



Vlasti bosanskih Srba u maju mjesecu 1992. godine izdaju naredbu putem lokalnog radija u Prijedoru kojom se obavezuje sve nesrpsko stanovništvo da na svoje kuće postavi bijele zastave ili čaršafe, a u slučaju izlaska iz kuće da rukav označe bijelom trakom. Napadi srpskih snaga su počeli na obližnja prijedorska naselja uključujući masovna ubijanja, silovanja, deportaciju i mnoge druge zločine. Između 26. i 30. maja otvoreni su koncentracioni logori za bošnjačko i hrvatsko stanovništvo Keraterm, Trnopolje i Omarska.

Takve užasne scene su prvi put viđene od nacističkih zločina iz perioda neposredno pred početak i tokom Drugog svjetskog rata kada su Jevreji morali nositi bijelu traku sa Davidovom zvijezdom oko rukava. Rezultat etničkog čišćenja je preko tri hiljade ubijenih među kojima 102 djece dok 94% prijeratnog nesrpskog prijedorskog stanovništva više ne živi u općini.

Odlazak jednog od najvećih zagovornika **ujedinjene Evrope**

U Ludwigshafenu (Njemačka) 16. juna 2017. godine umro je Helmut Kohl, njemački političar i državnik, jedan od najvećih zagovornika ujedinjene Evrope. Bio je kancelar Zapadne Njemačke (1982-1990) i ujedinjene Njemačke (1990-1998).

“Prema mom mišljenju, najveći državnik prošlog stoljeća bio je Helmut Kohl. On je ujedinio Njemačku i srušio Berlinski zid. To je bio najznačajniji događaj za čitavu Evropu..”
Alija Izetbegović



Druga posjeta BiH **Pape Ivana Pavla Drugog**

U okviru svoje druge posjete BiH, 22. 6. 2003. godine, poglavar Rimokatoličke crkve Ivan Pavao Drugi posjetio je Banju Luku i kod samostana na Petrićevcu služio misu.

Poštovanje svih građana naše domovine zadobio je osuđujući nasilje kako po BiH tako i posvuda po svijetu i pozivajući na mir. Predsjednik Alija Izetbegović je u više navrata riječima punim poštovanja ukazivao na ličnost i geste Ivana Pavla Drugog.



“Nikada nije bio samo na strani katolika. U Bosni se obraćao svima, pa i izričito muslimanima i osuđivao ravnodušnost svijeta prema sudbini žrtava. Malo je odgovornih ljudi u svijetu koji su u javnim obraćanjima toliko puta i tako često spomenuli Bosnu.” Alija Izetbegović

Dan pobjede nad fašizmom

Devetog maja 1995. godine Armija Republike Bosne i Hercegovine dobila je poziv za učešće na vojnoj paradi u Parizu u sklopu obilježavanja Dana pobjede nad fašizmom. Čast da predstavlja Armiju RBiH u velikoj antifašističkoj evropskoj porodici pripala je Semiru Drljeviću Lovcu, heroju grada na Neretvi, dobitniku Zlatnog ljiljana iz Mostara i pripadniku 41. slavne motorizovane Viteške brigade.



Sporazum o saradnji sa **Arhivom Federacije BiH**

U utorak, 5. 7. 2022. godine potpisan je Sporazum o saradnji između JU Muzej “Alija Izetbegović” i Arhiva Federacije Bosne i Hercegovine. Dokument su potpisali, ispred naše ustanove, Šejla Cakić Rizvanović, zamjenica direktorice i gospodin Hajrudin Čuprija, v.d. direktor Arhiva.

Saradnja će se odvijati kroz sljedeće oblike i vidove koji su od obostranog interesa potpisnica: saradnju na realizaciji naučno-istraživačkih i stručnih projekata, programa i aktivnosti kojima je predmet historija i kultura Bosne i Hercegovine; organiziranje naučnih i stručnih skupova, kulturnih manifestacija, edukacija, susreta, izložbi, promocija i sličnih naučnih, stručnih i kulturnih događaja; saradnja u arhivskoj, bibliotečkoj, muzejskoj i izdavačkoj djelatnosti; kao i zajedničko učešće i apliciranje za pristup fondovima namijenjenim finansiranju naučnoistraživačkog i stručnog rada.

Dan kada je BiH postala **članica UN-a**




Photo Credit: radiosarajevo.ba

Tog 22. maja 1992. godine svečano je podignuta zastava sa ljiljanima ispred zgrade UN-a. Taj sudbonosni dan jedan je od najznačajnijih datuma u historiji Bosne i Hercegovine. Prijemom u Ujedinjene Narode krunisan je proces međunarodnog priznanja njene suverenosti i nezavisnosti i prije svega volje njenih građana iskazan na referendumu 1. marta iste godine.

Nažalost, prilike za slavlje nije bilo. Kampanja etničkog čišćenja, ubijanja i drugih svirepih zločina tek je započela. Ipak, zastava sa ljiljanima na East Riveru u New Yorku dala je dodatan motiv braniocima Bosne i Hercegovine da istraju i sačuvaju BiH kakvu je zamišljala većina njenih građana. O takvoj Bosni i Hercegovini bi često govorio Predsjednik Izetbegović međunarodnim zvaničnicima i, generalno, svjetskoj javnosti:

“... Jer, u Bosni se, u neravnopravnoj borbi, pokušava odbraniti jedan eminentno evropski princip života i odnosa među ljudima i društvenim i nacionalnim grupama. To je princip različitosti i uzajamne tolerancije, primjer čega je Bosna i Hercegovina, uprkos svim historijskim iskušenjima, uvijek bila i što i danas sa utopijskom upornošću pokušava da ostane.”

Obilježavanje 32. godišnjice osnivanja Stranke demokratske akcije

Tog 26. maja 1990. godine u hotelu "Holiday Inn" održana je Osnivačka sjednica Skupštine, čime je formalno nastala SDA. Prvobitni odbor za osnivanje činilo je 40 intelektualaca, umjetnika i poduzetnika, a za prvog predsjednika stranke je izabran Alija Izetbegović. Bila je to prva stranka osnovana u Bosni i Hercegovini nakon 45 godina vladavine jednopartijskog komunističkog režima.

SDA, na čelu sa Predsjednikom Izetbegovićem, je bila glavni akter organizacije otpora agresiji kroz osnivanje Zelenih beretki i Patriotske lige. Nakon formalnog završetka agresije, na prvim poslijeratnim izborima 1996., SDA je odnijela ubjedljivu pobjedu, a Alije Izetbegović je ponovo izabran za predsjednika Predsjedništva. U godinama poraća SDA je nastavila biti jedna od najjačih političkih organizacija u nezavisnoj Bosni i Hercegovini.

"Predstoji novi dogovor naroda BiH i naroda Jugoslavije o tome kakvu Bosnu i kakvu Jugoslaviju hoćemo. Takve dogovore mogu voditi i sačiniti samo istinski predstavnici naroda, a istinske predstavnike može odrediti samo narod na slobodnim izborima. Bilo kojim putem da krenemo, uvijek dolazimo do one magične riječi koja se zove sloboda. Ona je cilj i put.", kazao je Predsjednik tog dana.



Bitka za brdo Žuč - 8. juni 1992. godine

Bitka za brdo Žuč bila je jedna od prvih pobjeda Armije RBiH. Njome je potvrđen uspjeh "Pofaličke bitke" i omogućeni preduslovi za dalje napredovanje oslobođanjem Kote 850, Visa i Golog brda. Bitka za brdo Žuč je jedna od najplodonosnijih bitaka Armije RBiH kojom je spriječena podjela Sarajeva i uveliko olakšana opsada stanovništvu grada potiskivanjem agresora od užeg gradskog jezgra.

"... Uvijek smo je (Bosnu) zamišljali kao zemlju dobrih, uspravnih i ispravnih ljudi. I vjerovali da je u tome moć Bosne, ali, i nemoć napadača koji su uvijek ponovo kidisali u nastojanju da je pokore. Kada se jednog dana budu pravile analize, kada se iz neke historijske udaljenosti bude odgonetalo to čudo bosanskog otpora, naći će se - siguran sam - da je ta tajna bila negdje u dušama ili karakteru ljudi."

Sjetite se proljeća i ljeta 1992. Mi gotovo goloruki, oni naoružani do zuba. A zatim, mi njih zajedno sa njihovim čeličnim grdosijama, postepeno potiskujemo iz grada, gore, u šume, gdje i pripadaju. Bio je to istinski sukob između dobra i zla, između čovjeka i nečovjeka. Duh je pobijedio. Ni po kakvoj vojnoj logici ni računici nisu oni tada trebali napustiti Sarajevo. Svi vojni aduti bili su na njihovoj strani, nijedan na našoj."

Iz obraćanja Predsjednika Alije Izetbegovića u povodu obilježavanja godišnjice bitke na Žuči - Sarajevo, 8. 6. 1996.



Prvi ambasador SAD-a u BiH

U Sarajevu 23. 6. 1993. godine akreditivne Predsjedniku Predsjedništva Aliji Izetbegoviću predao je prvi ambasador SAD-a u BiH Viktor Jakovič.

Čovjek posvećen demokratskoj, stabilnoj i prosperitetnoj BiH i nakon isteka svog mandata govorio je kao pravi prijatelj naše zemlje i njenih građana dijeleći često iste ideale kao i oni. Na večeri priređenoj u čast prijatelja Bosne koncem 1998. godine u Washingtonu, između ostalog, rekao je: "Zahvaljujem Aliji Izetbegoviću i Harisu Silajdžiću što su branili principe međunarodne zajednice, principe Evrope pa i principe Sjedinjenih Američkih Država."



512. Dani Ajvatovice - 25. 6. 2022.

Naša **snažna veza** sa prošlošću, ali i sa budućnošću

Ajvatovica je tradicionalno dovište bosanskih muslimana u drevnom gradu Pruscu, i mjesto gdje se u jednom danu okupi najviše ljudi u Bosni i Hercegovini. Iako u sebi ima i vjerskih elemenata Ajvatovica nije samo vjerska manifestacija.

“Ajvatovica koja, prema predanju, živi već preko petsto godina, koju su zabranjivali a nisu mogli da je zabrane, i koja je svake godine sve veća i bogatija, dokaz je da nismo ni pobjegli ni poklekli. Naprotiv, prolazeći kroz sve muke i nevolje, uspravni i ispravni, postali smo narod koji sav svijet poštuje i uvažava. Nečuvenom zlu i zulumu pružili smo otpor i taj otpor je bio ljudski i viteški - kako to našem narodu dolikuje. Ovo naše dovište je naša snažna veza sa prošlošću, ali i sa budućnošću.”

Alija Izetbegović - Dio govora na Ajvatovici, 1997. godine





Photo Credit: Mustafa Mlivo





ALIJA
IZETBEGOVIĆ
M U Z E J

JU Muzej "Alija Izetbegović" predstavlja iz svoje izdavačke djelatnosti knjigu **"Mislilac i državnik Alija Izetbegović"** autora Fikreta Muslimovića i Selme Cikotića



Cijena: 20 KM

Narudžbe možete izvršiti putem E-maila:
muzejalijaizetbegovic1@gmail.com

ili na telefon:
033 574 271

JU Muzej "Alija Izetbegović"



JU Muzej "Alija Izetbegović" predstavlja iz svoje izdavačke djelatnosti knjigu **"Mislilac i državnik Alija Izetbegović"** autora Fikreta Muslimovića i Selme Cikotića

U predgovoru akademik Ferid Muhić kaže: *"Knjiga jasno prezentira, uvjerljivo tumači i argumentirano naglašava duboko humanistički, liberterski karakter teorijskog opusa Alije Izetbegovića, koji, bez izuzetka, cijelim svojim teorijskim opusom i političkim djelovanjem, beskompromisno afirmiše vrijednosti jednakosti, pravednosti i slobode."*



Moja priča.